

Här Fernand Etgen
President vun der Deputéierte Chamber
19, um Krautmaart
L-1728 Lëtzebuerg


Lëtzebuerg, de 16. September 2022

Här President,
esou wéi d'Chambersreglement et virgesäit, bieden ech lech, dës parlamentaresch Fro un den Här Premierminister, d'Madamm Finanzminister an den Här Bausseminister weiderzeleeden.

D'europäesch Hëllef fir d'Ukrain ass net nëmme militäresch mee och finanziell. Heiriwwer wéilt ech d'Regierung em Prezisiounen bieden:

1. Wéi vill Milliarden u finanzieller Hëllef si bis ewell vun der EU un d'Ukrain zougesécher ginn, wéi vill sinn der scho gefloss?
2. Wat ass de Verwendungszweck vun dëse Suen? Ginn domat militäresch an technologesch Gidder kaf, fëlle si d'ukrainesch Staatskeess mat Liquiditéit fir lafend Ausgaben ze bezuelen oder gi si nach fir aner Zwecker agesat?
3. Wéi grouss war bis elo déi lëtzebuergesch Hëllef, fir respektiv zivil a militäresch Zwecker?
4. Iwwer wéi e Wee ginn déi europäesch, respektiv lëtzebuergesch Transaktiounen ofgewéckelt an zu wéi engem Deel ass d'Europäesch Investitiounsbank domat beoptraagt?
5. Entsprecht et de Missiounen vun der EIB direkt oder indirekt e Krich ze finanzéieren oder ass si net éischter statutaresh drop festgeluecht, grouss an nohalteg Infrastrukturprojeten an EU-Länner ze begleeden? Op hirer eegener Websäit beschreift d'Bank hir Missioun esou: „The mission of the European Investment Bank is to foster sustainable growth within the EU and abroad. We are firmly committed to sustainable development, which is anchored in our strategy and remains the foundation of our business model.“

Mat déiwem Respekt,



Fernand Kartheiser
Deputéierten



Äntwert vun der Finanzministesch Yuriko Backes an dem Aussen- an Europaminister Jean Asselborn op d'parlamentaresch Fro n°6857 vum 19. September 2022 vum Deputéierten Fernand Kartheiser zu den finanziellen Hëllef vum der EU un d'Ukrain

Säit der russescher Invasioun vun der Ukrain sinn op europäeschem Niveau eng Rei Mesuren geholl ginn fir d'Ukrain um wirtschaftlechen, sozialen a finanziellen Plang ze stäerken.

Aktuell beleeft sech d'Ënnerstëtzung, déi d'EU zougesot huet, op knapp 12 Milliarden Euro. Dës finanziell Hëllef sinn virun allem fir de Staatsapparat an essentiell Services vum Land während dem Krich z'erhalen.

De Finanzement gëtt gréisstendeels iwwert den EU Budget mobiliséiert an kann a folgend Kategorien agedeelt ginn :

a Milliarden Euro

Kategorie	Zougesoten Hëllef	Ausbezuelt resp. bereitgestellten Montanten
Humanitär Hëllef	0,335	0,268
Budgetär Ënnerstëtzung an aner Hëllef	1,244	0,650
Prête am Kader vun der <i>assistance macrofinancière</i>	7,200	4,200
EU-Garantien fir Prête iwwert d'BEI an d'BERD*	3,258	1,868
Total	12,037	6,986

*Banque européenne d'investissement (BEI), Banque européenne pour la reconstruction et le développement (BERD)
Quell: Commission européenne. Stand : Ufank Oktober 2022.

Zousätzlech zu den Hëllef, déi am Tableau opgelëscht sinn, ënnerstëtzt d'EU d'ukrainesch Arméi via hir *Facilité européenne pour la paix* mat 3,1 Milliarden Euro. Doriwwer eraus goufen iwwert den *EU Civil Protection Mechanism* Saachleeschtungen am Wäert vun 400 Milliounen Euro bereit gestallt.

Iwwerdeems huet d'BEI am März 2022 668 Milliounen Euro un direkt Hëllef fir d'Ukrain ausbezuelt. Eng weider Tranche vun 1,59 Milliarden Euro ass am Juli 2022 décidéiert ginn, wouvun bis elo 1,05 Milliarden Euro ausbezuelt ginn sinn.

Lëtzebuerg huet bis ewell 99,7 Milliounen Euro fir zivil a militäresch Zwecker mobiliséiert, wouvun 73,5 Milliounen Euro Militärhëllef duerstellen. Donieft bedeelegt de Grand-Duché sech un europäeschen an internationalen Initiativen, zum Beispill indirekt iwwert seng Kontributioun an den EU Budget oder direkt duerch d'Kontributioun an d'*Facilité européenne pour la paix*.



Andeems déi finanziell Ënnerstëtzung dem Land erméiglecht seng Infrastrukturen, essentiell Servicer a domat säin Staatsapparat während dëse schwéiere Zäiten um Liewen ze halen, gëtt d'Basis geluecht fir eng zukünfteg, nohalteg Entwécklung vun der Ukrain. Dës Hëllef sinn soumat en ligne mat de Missiounen vun der BEI an d'Lëtzebuerger Regierung ënnerstëtzt all entspriechend Initiativ vun dëser Institutioun.

Luxembourg, den. 24 Oktober 2022

D'Finanzministesch

(s.) Yuriko Backes